

大谷山堂集

大谷山堂集卷四

謝山夢

麟文子

登樓行陝州使院作

七月流火疾弗瘳十日不上西南樓今晨風色清
且柔憑欄聊作淩風游樓中几榻窗戶幽樓外巒
壑縈沙洲中條倏歛雲氣收萬尖突兀撐高秋寒
樹依微辨平陸炊煙點點微波浮黃河一線東方
流抱城北走寒悠悠誰家挂席乘扁舟流煙落日
不可留雲山緜渺生遠愁夢魂昨夜歸蘆溝歲聿

云莫心百憂今我不樂日月適當風一嘯翻輕鷗

晨游雞距山

上有河上公舊宅

東裝河上遊杖策雞距頂透絕沿青山空林踏人
影平野開天光蓬門闕深景清響振寒葉晨暉散
西嶺雨霽松色深風肅荷衣冷延迴挹高蹈空冥
認煙艇悵懷鸞鶴羣索居發深省

發陝過魏野草堂作

晨出城東門策馬初曜光微徑入層麓厥巔留孤
堂夾道多喬柯石磴緣高岡雲構面峭崿竹樹紛

琳琅秋色落平野草木涵清蒼圓沙起寒雁平楚
暄浮陽巖居旣采阻松風何悲涼君子貴用世道
蘊形亦藏理閱懷抱熟跡與鷗鴻翔循簷辨井竈
彷彿清風長攀林酌杯酒感激銜中腸

早發硤石

客愁如飄蓬隨風遍秋草飭服羣鷄鳴驅馬荒山
道宿霧眩猶積殘月悽已顥露湛枯菱明徑白空
巖曉沿轉眄平阡惆悵獨飛鳥無乃非故枝踟躕
出林杪出林亦何之游子中如擣忽憶密縫衣臨

風黯懷抱

古詩二首寄都中知己

步上城東臺蒼莽孤煙多長風吹輕雲倏忽離山
阿西望多蒼山北顧臨大河長空蔽昏景巨水揚
洪波去者自不息日落當如何我欲喚古人話此
中心嗟古人不我作涕下襟滂沱

富不須金玉貴不須王侯匹馬謁親戚杯酒歡朋
儔而我獨何爲浪跡南雲陬日暮臨高臺千里黃
塵浮微茫辨井邑奔走連墳邱舉首望故鄉落日

風鳴嗽高者爲山岳下者爲川流那將一寸心抱
此終古憂好識在鄉樂日月其未遒

題陳髯畫松障子

陰庭白日生精怪炎天六月氣清快急雨驚從古
壁翻陰飈欲撼檐牙壞怳惚天都峰已到峨嵋山
迴溪絕磴氣颯沓長空謾謾耳畔彷彿奔驚泉髯
也畫松不畫貌冥搜遐驚窺天奧意象雷驚電晦
時凌空推出蒼龍倒凝精閉戶二十日松濤驟起
髯落筆淋漓潑墨風雨疾橫榦直榦眞氣出霜株

離立色慘慄精芒四達鬼神入目斷晴崖晝霧昏
魂驚素壁空堂失下枝拂苔石上枝拏蒼穹大枝
勢倔强特立煙濛濛孫枝硯擺噓迴風北軒磅礴
意凜冽陰森直欲無真松髯也招我來東堂沉冥
卓午煙蒼茫好勤愛護秘什襲或恐雷公下取掀
重牆況值朱陽暘熱遍行旅安得持此陰庇一洗
煩溽歸清涼越禽代馬嗟殊向不見髯翁對髯障
雨濕笑囊意屢淒風迴角枕神空王若耶溪水香
爐峰知君處處扶青筇好將赤縣滄洲趣來寫塵

埃冰雪胸

新安坑卒行

嗚呼人世殺機真慘絕二十萬眾喪倉卒黃泉無
路排重閭煩冤鬱屈天爲赤祖龍何許歸沙邱義
旗爰舉東諸侯誰提鐵騎揮長矛風雲指顧炯兩
眸指揮萬卒聲鳴啾陰氛晦日寒天愁風吹碧血
生秋草荒郊呼嘯達昏曉君王自有函谷關何與
新婚共垂老長安砧杵萬家聲準量腰帶爲誰好
前年力盡阿房宮今晨骨暴新安道九原愧見趙

將軍肝膽平原任懷抱塵霾晝起黃雲開長林叟
叫孤鴻飛高冠使者弘農來日落駐馬相裴徊新
安城頭暮吹角青燐點點秋風哀草冷孤城氣肅
肅魂兮歸來不可觸不見長平坂汾河曲寒雨荒
榛黯平陸夜深狐兔竄深蒿嗚嗚舊鬼秋衢哭

龍門

龍門形勝天下奇面嵩俯洛中貫伊呀然兩闕森
角圭每以風雨爲合離連山欲暝雲封之朱樓突
兀青峰基松毛石髮相倒垂蒼麟萬本蟠之而如

龍出淵半藏霧時露指爪頭角遺西巖石洞鑿者
誰班班刻畫紛蛟螭蠻君鬼伯熊羆姿前驅虎豹
羆與狸或瞠目視豐兩頤一燈孤炯懸琉璃長衣
侍者低雙眉如笑如慕如深思造福乃復暴民力
婦人之見良足嗤

洞爲魏太后
作功德造

感此太息一長嘯

半空響荅巖谷隨畫船簫管不可期撞鐘伐鼓相
娛嬉鏗鉤澗壑萬霆怒山靈恍惚翻雲旗誰分玉
鏡澄階墀千珠跳擲紛漣漪動蕩窗戶搖緹帷山
巔一亭最孤絕攀捫蘿葛中忘疲對崖石徑何逶

迤花宮雲磴留清颺高秋萬態簇蒼媚丹樓紫閣
青空披山水映帶乃復獲真趣去一坐失天然姿
始知造物位置得天巧俗手點綴能爾爲去年
仙蹕曾駐此顧眄草木周恩私至今御榻峙行
殿夜深神物煩護持我來瞻拜隨鳬鷺欲雨不雨
天氣迷作歌恐遂驚罍愚矯首北望神先馳

香山寺

行藥來東巖蓮宇締遐慕閒隨沙上鷗識此松間
路捫蘿怯遙磴履石眇前渡延景餘奢忱尋異無

停顧薜荔縈朱門遂果幽勝趣置窗山翠鑿就石
危欄住寒空媚雲景適與孤鳥遇靄靄山外煙離
離山下樹無心與之遭悠然得良晤疊嶂開遙青
長河澹晚素余懷倏已殫目成意先赴迴憶塵市
喧頗窘幽人步慨慷聞鐘聲松桂空山暮

香山晚坐

秋晚珠閣涼青山澹將夕復此巖上佳披襟坐溪
石歸雲拂空林蓊然翳餘碧美人何時還娟娟秋
水隔勞者徒爲歡去矣將何適飛葉響寒山臨流

悵行客

夜自賓陽洞歸宿香山

暮山迢遞濃雲合良夜維舟傍清峽停橈覓路濕
螢飛西巖鐘響東巖苔東巖曛黑門應閉晚雨空
濛濕衣袂天寒夜寂松風吟閃閃燈光射窗際敲
門拂面嚴霜重遙知童僕各成夢黑甜一枕不知
尋卻趁寒宵踏巖洞是間清絕誰主人煙霞餐飽
知何用入戶打火佛燈紅遠聞石齒號驚風繩牀
一覺睡初熟醒來獨聽寒山鐘

雨後泥濘夜半赴偃師作歌

日之夕矣嵐氣昏長衢雨作波濤翻旋渦起伏路
崩壞平渠叫鬧鳴蛙喧眾星韜匿萬樹黑山逕犖
确濃雲屯余也策馬東南奔泥沒馬腹馬意怯鞭
之欲動愁翻掀陵巒入眼眩深黑長途舉足資攀
援朝食未舉更入夜饑腸鳴叫徒相捫計程半日
到頗易蒼天一雨遂使跬步膠輪轅傳聞昨日雨
最大波傾浪滾如翻盆我時攜伴宿伊闕山煙漁
火開金樽雲山綿邈我心悅傾壘一洗塵囂煩今

雨舊雨本無異險艱歷盡憂思繁倏忽翻覆那可
料世間萬事難重論君不見長河夜吼驚三門狂
瀾噴薄勢可吞天昏雨激應更聞繞牀啟戶夜恍
惚矯首一乞蒼天恩

時河決陽武堤工未竣

晴赴鞏縣作

積雨增羈枕蕭辰悵冥晦奔走泥活活襟履動沾
穢今晨一何佳空宇乍清淬四野舒澄暉林原麗
藻纈鮮新秋氣出豁達雲翳退日涌披遙丹煙銷
露遐黛俯仰延天光適與嵩高對巖岫矗蒼峭雲

物忽破碎離披萬樹錯岌業一峯背排遣驅宿棕
流覽及新泰始知秋宇空舉目了無礙跋馬心悠
然風塵謝流輩

黑石渡

坡陀兩崖斷嶮絕一峰矗徑石疊深墨鏗錡動車
軸長河乍北轉迴巒忽東逐川流靜澹沲巖木鬱
森肅暎空泉石迴拂馬松柏禿迴顧嵩高山崦嵫
波上綠秋色從西來蒼茫入函谷是時秋雨餘萬
象出新沐空宇淨如拭芳萸藉文轂危葉雜鮮麗

燦比朝繡簇煙起樹若羃雲歸岫疑復及此風日
佳輪蹠忘碌碌問渡立夕陽人語驚鷗宿

鞏縣夜起

時代有變易客愁無古今披衣坐清夜肅肅堂廡
深開軒滅明燭華月懸高林皓露忽已零微風驚
棲禽旅雁何方來叫雲悲我忱連行過東北無乃
非鄉音客遙乏近想慮集渺信心已怯樓上笛復
此風中砧含情歲云晏恐遂霜雪侵

虎牢